

Møteinnkalling

Utval:	Arbeidsutval delegeringsreglement
Møtestad:	Digitalt møte
Dato:	03.12.2021
Tid:	10:00

Melding om forfall:

Alle medlemmer vil få tilsendt ein e-post kor det vert forklart korleis forfall kan registrerast. Denne e-posten vil kome innan to dagar.

Innkallinga gjeld valde medlemmer i Arbeidsutval delegeringsreglement. Ved eventuelt forfall frå faste medlemmer vil varamedlemmer bli kalla inn særskilt.

Tor Andre Ljosland

Utvalsleiar

Saksliste

Utvals- saksnr	Innhald	Arkiv- saksnr	U.Off
GK 7/21	Godkjenningssaker Godkjenning av møteinnkalling og sakliste		
PS 6/21	Politiske saker Oppstart av prosess kring revidering av forskrift for økonomisk godtgjersle og arbeidsvilkår for folkevalde i Vestland fylkeskommune	2019/13	

Godkjenningssaker

GK 7/21 Godkjenning av møteinnkalling og sakliste

Politiske saker

PS 6/21 Oppstart av prosess kring revidering av forskrift for økonomisk godtgjersle og arbeidsvilkår for folkevalde i Vestland fylkeskommune

Saksnr: 2019/13-21
Saksbehandlar: Silje Balgaard Lyngstad

Saksgang

Utval	Utv.saksnr.	Møtedato
Arbeidsutval delegeringsreglement	6/21	03.12.2021

Oppstart av prosess kring revidering av forskrift for økonomisk godtgjersle og arbeidsvilkår for folkevalde i Vestland fylkeskommune

Forslag til vedtak

1. Arbeidsutval delegering gjev slike føringar i oppstart av arbeidet med revidering av forskrift for økonomisk godtgjersle og arbeidsvilkår for folkevalde i Vestland fylkeskommune:
.....
2. Arbeidsutval delegering gjev slike føringar i oppstart av arbeidet med revidering av partistøtte og fordelingsnøkkel:
.....

Samandrag

Fylkestinget vedtok september 2020 at arbeidsutval for delegering mellom anna skal legge fram forslag til revidert forskrift om økonomisk godtgjersle og arbeidsvilkår for folkevalde. I mars 2021 vedtok fylkestinget at arbeidsutvalet sitt mandat vert utvida til å vurdere endringar kring regulering av partistøtte. I juni 2021 vart det i fylkestinget vedteke at forskrifta skal gjennomgå revidering og vedtakast i løpet av første halvår av valåret når det er fylkestingsval.

For å sikre god prosess og framdrift med dette arbeidet vert arbeidsutval for delegering i oppstartsfasen bede om å legge føringar for kva som skal vere gjenstand for revidering.

Rune Haugsdal
fylkesdirektør

Ingrid Kristine Holm Svendsen
avdelingsdirektør

Saksframlegget er godkjent elektronisk og har difor inga handskriven underskrift

Vedlegg

- 1 Forskrift for økonomisk godtgjersle og arbeidsvilkår for folkevalde i Vestland fylkeskommune
- 2 PS 19/19 - Fordelingsnøkkel for partistøtte i Vestland fylkeskommune (saksframlegg)
- 3 PS 19/19 - Fordeling av partistøtte i Vestland fylkeskommune - saksprotokoll

Saksutgreiing

Bakgrunn for saka

I fylkestinget september 2020 vart det i sak PS 111/2020 Reglement for folkevalde organ og delegering fatta slikt vedtakspunkt 3:

«3. Fylkestinget ber utvalet beståande av:
 -Tor Andre Ljosland (leiar)
 -Aleksander Øren Heen
 -Silja Ekeland Bjørkly
 halde fram arbeidet med følgjande mandat:
 Utvalet skal leggje fram forslag til revidert reglement for folkevalde organ og delegering, forskrift om økonomisk godtgjersle og arbeidsvilkår for folkevalde og etisk regelverk.»

Det vart i fylkestinget i mars 2021 i sak PS 4/2021 gjeve utvida mandat til utvalet:
 «Arbeidsutvalet sitt mandat vert utvida til å vurdere endringar kring regulering av partistøtte. Fordelinga ligg fast i innværande periode.»

I fylkestinget juni 2021 i PS 68/2021 vart følgjande formulering tatt inn i forskrift for økonomisk godtgjersle og arbeidsvilkår for folkevalde i § 1-1 tredje ledd:

«Forskrifta skal gjennomgå revidering og vedtakast i løpet av første halvår av valåret når det er fylkestingsval.»

Neste fylkestingsval er hausten 2023. Dette inneber at forskrifta må reviderast og vedtakast med siste frist på Vestland fylkesting sitt tingsete i juni 2023. Dette betyr at det er naudsynt å allereie no starte prosess med revidering av forskrifta og partistøtta.

Forskrift for økonomisk godtgjersle og arbeidsvilkår for folkavelde i Vestland fylkeskommune bygger i hovudsak på politiske føringar, og innehar såleis eit breitt handlingsrom for dei folkevalde når det kjem til rettar og plikter. For at fylkesdirektøren skal kunne leggje fram forslag til revidert forskrift er det ein føresetnad at arbeidsutvalet legg føringar for kva som skal vere gjenstand for revidering. Desse føringane vil gje grunnlag for den vidare saksutgreiinga.

Arbeidsutval for delegering vert særleg beden om å gje føringar på:

- Berekningsgrunnlaget
- Frikjøpsordninga
- Partistøtta - fordelingsnøkkel

Berekningsgrunnlaget i forskrifta, slik ho er i dag, har sitt grunnlag i stortingsrepresentantane si årlege godtgjering. Denne har vore fryst sidan mai 2019 på grunn av revidering og gjennomgang frå Stortinget sin lønnskommisjon (frå 01.10.21: Stortinget sitt godtgjeringsutval). Dette inneber at dei ulike satsane i forskrifta i Vestland fylkeskommune ikkje har hatt ei årleg aukiing (lønnjustering) som følge av at den heller ikkje har vore justert på hjå stortingspolitikarane. Endeleg resultat av arbeidet til Stortingets si godtgjeringsutval er enda ikkje vedteke. Fylkesdirektøren har vore i kontakt med sekretariatet til Stortingets sin godtgjeringsutval for å få eit estimat på når ein kan forvente at arbeidet er ferdig. Det vert opplyst at arbeidet nærmar seg slutten, men at det ikkje er mogleg å gje ein konkret dato for behandling. Innstillinga frå lønnskommisjonen skal først opp til behandling i presidentskapet før den til slutt kjem til behandling i Stortinget. Det er venta at vi vil finne meir konkret informasjon om behandlingsprosess i løpet av desember 21/januar 22. Fylkesdirektør vil følge sluttarbeidet tett og oppdatere arbeidsutvalet når endeleg vedtak i Stortinget er klart.

Rettsleg utgangspunkt for endring av forskrift

Forskrift for økonomisk godtgjersle og arbeidsvilkår for folkavelde i Vestland fylkeskommune er heimla i kommunelova § 8-3 og § 8-4. Det er fylkestinget som sjølv skal gje forskrift i tråd med krava i paragrafane. Forskrift skil seg frå reglement fordi ein ved bruk av forskrift må halde seg innafor formkrav til utgreiing, høyring, oppsett, publisering og tilgjengleggjering. Det er forvaltningslova kap. VIII som regulerer formkrav og prosess kring vedtaking av forskrift. Det følgjer av forvaltningslova § 37:

«Forvaltningsorganet skal påse at saken er så godt opplyst som mulig før vedtak treffes.

Offentlige og private institusjoner og organisasjoner for de erverv, fag eller interessegrupper som forskriftene skal gjelde eller gjelder for eller hvis interesser særlig

berøres, skal gis anledning til å uttale sig før forskriften blir utferdiget, endret eller opphevet. Så langt det trenges for å få saken allsidig opplyst, skal uttalelse også søkes innhentet fra andre.

Forvaltningsorganet bestemmer på hvilken måte forhåndsvarslingen skal foregå og kan sette frist for å gi uttalelse.

Forhåndsvarsling kan unnlates forsåvidt den:

- a) ikke vil være praktisk gjennomførlig, eller
- b) kan vanskeliggjøre gjennomføring av forskriften eller svekke dens effektivitet, eller
- c) må anses åpenbart unødvendig.

Uttalelser skal gis skriftlig. Forvaltningsorganet kan i den enkelte sak samtykke i at uttalelse gis muntlig. Når saken egner sig for det, kan forvaltningsorganet bestemme at forhandlinger om saken skal foregå i møte.»

Fvl. § 37 syner til at også endringar/revidering og krev ein høyringsprosess. Brot på fvl. § 37 første og annet ledd kan føre til at forskrifta vert ugyldig etter fvl. § 41. Det vert presisert at mindre endringar slik som vert vedteke i juni 2021 fell inn under § 37 fjerde ledd bokstav c.

Kven skal vere høyringsinstans?

I forskrifta § 1 anna ledd går det fram at «*Forskrifta gjeld for folkevalde medlem og varamedlem av fylkestinget og andre fylkeskommunale organ som har heimel i kommunelova eller særlov, og organ kor medlem er oppnemnd av eller etter fullmakt frå fylkestinget. I tillegg gjeld reglementet for fylkeskommunane sine tillitsvalde i fylkeskommunale organ.*»

Det er fylkesdirektøren si vurdering at alle som er omfatta av § 1 anna ledd vert å sjå som høyringsinstans.

Når i prosessen må høyringa annonserast?

Føremålet med fvl. § 37 er at dei som skal vere høyringsinstans, og vert varsla, skal ha ein reell moglegheit til å påverke innhaldet og utforminga av forskrifta. I kravet om moglegheit til å uttale seg må difor ligge at høyringsinstansane skal varslast når arbeidet med forskrifta er under førebuing, og bli underretta om høve til å gje uttale før arbeidet er slutt og ferdig utkast er klart. Lova gjev ingen indikasjon på kva form saka skal presenterast. Det vanlege er at det førebuaende organet lagar eit utkast til forskrift som kan brukast som grunnlag for høyringsinstansen sin uttale, men det skal gå klart fram at dette er eit førebels utkast i påvente av høyringsuttalane. Fylkesdirektøren rår til at høyringa vert annonsert etter første behandling i arbeidsutval for delegeringsreglement og fylkesutvalet i mars 2022.

Kor lang skal høyringsfristen vere?

Fristen skal som utgangspunkt vere lang nok til at høyringsinstansen og forvaltninga har eit utgangspunkt å halde seg til. Ved fastsettinga av frist skal ein ta omsyn til kor viktig saka er og kor mykje den hastar. Fvl. § 37 sett altså ikkje ein spesifikk frist.

I følgje Utredningsinstruksen (Instruks om utgreiing av statlege tiltak, fastsett ved kongeleg resolusjon 19. februar 2016 med heimel i instruksjonsmyndigheita) pkt. 3.3 første ledd siste punktum, skal høyringsfristen ved førebuinga av statlege forskrifter normalt vere tre månader og ikkje mindre enn seks veker, med mindre «*spesielle forhold gjør det nødvendig*».

Forskrift om godtgjersle er eit sentralt høve ved dei folkevalde sitt virke i fylkeskommunen. Gitt at arbeidet med revideringa startar i løpet av vinter/vår 2022 er det fylkesdirektøren si tilråding at høyringsfristen vert satt til 3 månader i tråd med utgreiingsinstruksen beskrive over.

Vedtakskompetanse

Arbeidsutval delegering har kompetanse etter vedtak i fylkestinget.

Vurderingar og verknader

Økonomi: revidering av forskrift for økonomisk godtgjersle og arbeidsvilkår for folkevalde i Vestland fylkeskommune samt endring av partistøtte vil kunne ha innverknad på økonomien.

Klima: Ikkje relevant.

Folkehelse: Ikkje relevant.

Utviklingsplan for Vestland 2020-2024 (Regional planstrategi): Ikkje relevant.

Konklusjon

Fylkesdirektøren ber arbeidsutval for delegering om å legge føringar for det vidare arbeidet med revidering av forskrift for økonomisk godtgjersle og arbeidsvilkår for folkavelde i Vestland fylkeskommune.



Forskrift for økonomisk godtgjersle og arbeidsvilkår for folkevalde i Vestland fylkeskommune

Dato	FOR-2019-10-15-2211
Ikrafttredelse	15.10.2019
Sist endret	FOR-2021-06-17-2144
Gjelder for	Vestland
Hjemmel	LOV-2018-06-22-83-§8-1, LOV-2018-06-22-83-§8-2, LOV-2018-06-22-83-§8-3, LOV-2018-06-22-83-§8-4, LOV-2018-06-22-83-§8-5, LOV-2018-06-22-83-§8-6, LOV-2018-06-22-83-§8-10
Kunngjort	27.01.2020 kl. 14.00
Korttittel	Forskrift for økonomisk godtgjersle og arbeidsvilkår for folkevalde i Vestland fylkeskommune

Kapitteloversikt:

Kapittel 1. Forskriftas føremål (§1-1)

Kapittel 2. Faste godtgjersler (§§ 2-1 - 2-8)

Kapittel 3. Møtegodtgjersle (§§ 3-1 - 3-5)

Kapittel 4. Vederlag for tapt arbeidsinntekt (§§ 4-1 - 4-6)

Kapittel 5. Godtgjersler ved deltaking på gruppemøte, kurs, synfaring og liknande (§§ 5-1 - 5-4)

Kapittel 6. Vederlag for påførte utgifter (§6-1)

Kapittel 7. Skyss og køyregodtgjersler m.m. (§§ 7-1 - 7-3)

Kapittel 8. Utgifter til telefon og breiband (§8-1)

Kapittel 9. Pensjonsmedlemskap, forsikringar og permisjon (§§ 9-1 - 9-5)

Kapittel 10. Ordningar for fylkesordførar og fylkesvaraordførar (§§ 10-1 - 10-2)

Kapittel 11. Politikardagar (§11-1)

Kapittel 12. Ettergodtgjersle (§12-1)

Kapittel 13. Innlevering av reiserekning mv. (§13-1)

Kapittel 14. Frikjøpsordninga (§14-1)

Kapittel 15. Regulativ for godtgjersler og vederlag til folkevalde (§15-1)

Kapittel 16. Ikrafttredelse (§16-1)

Heimel: Fastsett av fylkestinget i Vestland fylkeskommune 15. oktober 2019 med heimel i lov 22. juni 2018 nr. 83 om kommuner og fylkeskommuner (kommuneloven) § 8-1, § 8-2, § 8-3, § 8-4, § 8-5, § 8-6 og § 8-10.

Endra ved forskrift 17 juni 2021 nr. 2144.

Kapittel 1. Forskriftas føremål

§ 1-1. Forskriftas føremål

Forskrifta har til føremål å sikre folkevalde kompensasjon for sin arbeidsinnsats, erstatning for tapt arbeidsinntekt og dekking av reelle utgifter i samband med utøving av vervet.

Forskrifta gjeld for folkevalde medlem og varamedlem av fylkestinget og andre fylkeskommunale organ som har heimel i kommunelova eller særlov, og organ kor medlem er oppnemnd av eller etter fullmakt frå fylkestinget. I tillegg gjeld reglementet for fylkeskommunane sine tillitsvalde i fylkeskommunale organ.

Forskrifta skal gjennomgå revidering og vedtakast i løpet av første halvår av valåret når det er fylkestingsval.

Forskrifta er utarbeidd med grunnlag i kommunelova av 2018 kapittel 8.

Det vert vist til § 15-1 i forskrifta for satsar for godtgjersler og vederlag, samt regulering av satsar.

0 Endra ved forskrift 17 juni 2021 nr. 2144.

Kapittel 2. Faste godtgjersler

§ 2-1. Faste godtgjersler

Følgjande folkevalde skal ha faste godtgjersler:

- a. Fylkesordførar
- b. Fylkesvaraordførar
- c. Fylkestingsmedlemene
- d. Fylkesutvalsmedlemene
- e. Leiarane for hovudutvala og kontrollutvalet
- f. Nestleiarane for hovudutvala og kontrollutvalet
- g. Hovudutvalsmedlemene
- h. Kontrollutvalsmedlemene
- i. Leiarane for:
 - Yrkesopplæringsnemnda
 - Fylkeseldrerådet
 - Rådet for menneske med nedsett funksjonsevne
 - Vestland ungdomsutval
 - Trafikktryggingsutvalet
 - Styret for fagskuleutdanninga
 - Klagenemnda.

§ 2-2. Fylkesordfører

Godtgjersla vert fastsett for kvar valperiode av det konstituerande fylkestinget. Godtgjersla skal justerast årleg tilsvarande lønsutviklinga til stortingsrepresentantane.

0 Endra ved forskrift 17 juni 2021 nr. 2144.

§ 2-3. Fylkesvaraordfører

Godtgjersla er sett til stortingsrepresentantane si godtgjersle.

§ 2-4. Andre folkevalde

Godtgjersla til folkevalde, med unntak av fylkesordfører og fylkesvaraordfører, vert berekna med grunnlag i 92 % av stortingsrepresentantane si godtgjersle.

Folkevalde kan ha fleire ulike funksjonar og dermed krav på godtgjersla som høyrer til kvar enkelt funksjon. Likevel skal ikkje summen av faste godtgjersler overstige 92 % av stortingsrepresentantane si godtgjersle.

§ 2-5. Godtgjersle til ulike politiske funksjonar og roller

Fylkesutvalsmedlemane, leiarane for hovudutvala og kontrollutvalet og gruppeleiarane for partigruppene i fylkestinget vert frikjøpte i si rolle. Det inneber at ein mottak ei fast godtgjersle i staden for dekking av tapt arbeidsinntekt og arbeidsgodtgjersle, jf. kommunelova § 8-5.

Som fylkesutvalsmedlem vert ein frikjøpt med grunnlag i 50 % av berekningsgrunnlaget. Funksjonen som fylkesutvalsmedlem inneber at ein òg sit i eit hovudutval. Godtgjersla som fylkesutvalsmedlem skal òg dekke rolla som hovudutvalsmedlem. Fylkesutvalsmedlemane får difor ikkje fast godtgjersle som hovudutvalsmedlem, møtegodtgjersle eller vederlag for tapt arbeidsinntekt for møte i hovudutvala. Viss ein vert nestleiar i eit hovudutval får ein ei ytterlegare godtgjersle på 5 % av grunnlaget.

Som leiar i eit av hovudutvala eller kontrollutvalet vert ein frikjøpt med grunnlag i 50 % av berekningsgrunnlaget. Funksjonen som leiar inneber at når ein møter i kraft av rolla som hovudutvalsleiar eller kontrollutvalsleiar ikkje får utbetalt møtegodtgjersle eller vederlag for tapt arbeidsinntekt.

Gruppeleiarane i partia vert frikjøpt med grunnlag i 35 %–50 % av berekningsgrunnlaget. Gruppeleiarane si godtgjersle vert differensiert i to intervall etter tal representantar i fylkestinget. Rolla som gruppeleiar inneber å leie og koordinere det politiske arbeidet som partigruppa utøver i fylkestinget. Godtgjersla dekkjer møtegodtgjersle, vederlag for tapt arbeidsinntekt, førebuing og deltaking i møter, konferanse, synfaring m.m. Gruppeleiarane får difor ikkje fast godtgjersle som fylkestingsmedlem, møtegodtgjersle eller vederlag for tapt arbeidsinntekt for møte i fylkestinget.

Dersom fylkesvaraordfører er gruppeleiar, vert gruppeleiar godtgjersla overført til partigruppa. I slike tilfelle fordeler partigruppa midlane sjølve. Godtgjersla vert utbetalt på grunnlag av gruppeleiar sin attestasjon.

§ 2-6. Frikjøp tilsvarande heil stilling

Fylkesordfører og fylkesvaraordfører og andre folkevalde som i sum har faste godtgjersler tilsvarande 92 % av berekningsgrunnlaget skal reknast for å vere 100 % frikjøpte.

Godtgjersla er ei totalgodtgjersle som omfattar fast godtgjersle, møtegodtgjersle og vederlag for tapt arbeidsinntekt for alle verv vedkomande har, der valet eller oppnemninga er resultat av direkte vedtak i eit fylkeskommunalt vedtaksorgan.

§ 2-7. Reduksjon i fast godtgjersle og tilhøve til offentlege ytingar

Dersom ein representant har fråvær i meir enn 25 % av møta, vert den faste godtgjersla redusert tilsvarande det totale fråværet. Dersom fråværet skuldast anna fylkeskommunal verksemd, sjukdom, fødsels- og adopsjonspermisjon vert det ingen reduksjon i den faste godtgjersla. Fylkeskommunen betaler likevel ikkje godtgjersle lengre enn 12 md. Føresetnaden er at ein har teke til i vervet.

I tilfelle kor fråvær skuldast sjukdom, fødsels- og adopsjonspermisjon vil fylkeskommunen betale ut differansen mellom ytingar utbetalt frå NAV og den godtgjersla den folkevalde får frå fylkeskommunen. Dette gjeld og ytingar utover 6G. Den folkevalde skal og ha full godtgjering dei første 16 dagane av sjukefråværet (arbeidsgivarperioden). Fylkeskommunen betaler likevel ikkje godtgjersle lengre enn 12 md. Føresetnaden er at ein har teke til i vervet. Fylkeskommunen har ikkje innsynsrett inn mot NAV, og den folkevalde skal difor sende alle relevante vedtak snarast.

Årsak til fråværet skal opplysast og dokumenterast. Fylkesordføraren avgjer om fråværet skal telje med i «25 %-regelen» i tvilstilfelle. Godtgjersla vert i alle høve ikkje betalt utover den perioden ein er vald for.

Dersom fylkesutvalet/hovudutvalet har samrådingar, synfaringar, temamøte eller liknande dagen før eller etter eit møte med saksbehandling, vert også denne dagen rekna som møtedag i høve til «25%-regelen».

0 Endra ved forskrift 17 juni 2021 nr. 2144.

§ 2-8. Fast godtgjersle til medlem

Varamedlem som møter i meir enn 25 % av møta får prosentvis fast godtgjersle i høve til frammøte. Det vert då ikkje betalt møtegodtgjersle. Det same gjeld for nestleiarar som fungerer for leiar med fast godtgjersle. Det vert føreteke ei avrekning mot slutten av året for dei representantane dette er aktuelt for.

Kapittel 3. Møtegodtgjersle

§ 3-1. Møtegodtgjersle

Møtegodtgjersle for møtande representantar og varamedlem i fylkeskommunale organ oppretta etter kommunelova § 5-1 og § 5-2, vert utbetalt for kvar møtedag i same organ.

Valde representantar til møter kor Vestland fylkeskommune har ei rolle, men som fell utanfor kommunelova § 5-1 og § 5-2, får utbetalt møtegodtgjersle med 50 %. Godtgjersle vert likevel ikkje utbetalt når denne vert dekkja av andre.

Representantane som har fast godtgjersle har ikkje krav på møtegodtgjersle for møte i det utvalet ein har fast godtgjersle i, eller når ein møter i kraft av si stilling som til dømes hovudutvalsleiar, fylkesutvalsmedlem, gruppeleiar m.m. Varamedlemer har krav på møtegodtgjersle.

Fylkesutvalmedlemene får ikkje møtegodtgjersle for møte som følgjer av fylkesutvalet sine andre roller og funksjonar. Leiarane av hovudutvala og kontrollutvalet får ikkje møtegodtgjersle for møte der dei møter i eigenskap av hovudutvalsleiar/kontrollutvalsleiar. I begge tilfella gjeld dette møte i finansutvalet.

0 Endra ved forskrift 17 juni 2021 nr. 2144.

§ 3-2. *Fleire møte same dag*

Dersom folkevalde møter i fleire utval same dag, har ein rett på ei møtegodtgjersle per utval.

§ 3-3. *Dobbel møtegodtgjersle*

Utvalsleiarar som ikkje har fast godtgjersle får dobbel møtegodtgjersle.

Nestleiar eller andre, som ikkje har fast godtgjersle, som må leie heile møte i leiaren sitt fråvær, får dobbel møtegodtgjersle.

§ 3-4. *Arbeidstakarrepresentantar*

Arbeidstakarrepresentantar i folkevalde organ har same rettar til godtgjersle etter regulativet som dei folkevalde medlemene av organet.

Møtegodtgjersle vert ikkje gitt til arbeidstakarar som møter i kraft av si stilling.

§ 3-5. *(Oppheva)*

0 Oppheva ved forskrift 17 juni 2021 nr. 2144.

Kapittel 4. Vederlag for tapt arbeidsinntekt

§ 4-1. *Generelt*

Folkevalde skal ha vederlag for tap av inntekt som følge av tillitsvervet. I særlege høve kan andre verv, etter fylkesordførar si avgjerd, gje rett til tapt arbeidsforteneste.

Det gjeld ein sats for legitimert tap og ein sats for ulegitimert tap, jf. § 15-1 i forskrifta. Satsane dekkjer tapt inntekt og feriepengar.

Dersom det ikkje ligg føre dokumentasjon på inntektstapet, vert vederlaget gitt etter satsen for ulegitimert tap, såframt tapet er sannsynleggjort.

Vederlag kan gjevast til arbeidstakarar, sjølvstendig næringsdrivande og personar utan arbeidsinntekt dersom dei må forsøme sine ordinære gjeremål for å ivareta tillitsvervet, t.d. heimeverande, studentar og pensjonistar.

Fylkesrådmannen avgjer i kvart tilfelle om det ligg føre faktisk inntektstap.

0 Endra ved forskrift 17 juni 2021 nr. 2144.

§ 4-2. *Unntak*

Gruppleiarane, fylkesutvalsmedlemene, leiarane i hovudutvala og kontrollutvalet får ikkje betalt vederlag for tapt arbeidsinntekt når dei møter i eigenskap av rolla si, jf. § 15-1 i forskrifta.

Fylkesutvalsmedlemene får ikkje vederlag for tapt arbeidsinntekt for møte som følge av fylkesutvalet sine spesielle funksjonar, t.d. funksjonen som finansutval og planutval.

§ 4-3. *Personar med lønsinntekt*

Tapt arbeidsinntekt bør dekkast ved at arbeidsgivar fakturerer fylkeskommunen direkte for fråvær, for å hindre at folkevalde taper pensjon. I slike tilfelle kjem arbeidsgivaravgifta i tillegg til satsane som er omtala i § 4-1.

§ 4-4. *Sjølvtendig næringsdrivande*

Dersom inntektstapet er større enn satsen for ulegitimert tap, kan inntektstapet dokumenterast med likningsattest for det siste året. Som alternativ kan ein ta utgangspunkt i gjennomsnittet for likningsattestane for dei tre siste åra.

Kapital- og pensjonsinntekter som kjem inn uavhengig av eige nærvær på arbeidsplassen vert ikkje medrekna i grunnlaget. Det er den pensjonsgivande inntekta med fråtrekk for godtgjersla folkevalde har fått utbetalt frå fylkeskommunen som skal leggjast til grunn.

Inntektstapet pr. dag vert utrekna etter netto årsinntekt dividert på 260 dagar.

§ 4-5. *Personar utan lønsinntekt*

Denne gruppa får dekkast tap tilsvarande satsen for ulegitimert tap.

§ 4-6. *Folkevald tilsett i fylkeskommunen*

Folkevald som er tilsett i fylkeskommunen får utbetalt si ordinære løn i fylkeskommunen.

Ved fråvær utover 10 dagar per år kan vedkomande institusjon krevje refusjon for ev. vikarutgifter. Refusjonskrav vert å sende fylkesrådmannen.

Kapittel 5. Godtgjersler ved deltaking på gruppemøte, kurs, synfaring og liknande

§ 5-1. *Gruppemøte*

Gruppemøte som vert haldne i fylkestingsgruppene før opninga av fylkestinget, vert rekna som ein del av fylkestingsmøtet og gir ikkje grunnlag for egne godtgjersler.

§ 5-2. *Kurs, konferanse o.l.*

Ved deltaking på kurs, konferansar, folkemøte og liknande vert det gitt vederlag for tapt arbeidsinntekt og skyss-, kost- og opphaldsgodtgjersle. Det vert ikkje gjeve møtegodtgjersle. Det vert ikkje betalt vederlag for tapt arbeidsinntekt dersom ein deltek i eigenskap av rollene nemnt under § 2-5 i forskrifta.

Slik deltaking skal vera avtala og godkjent av fylkesordførar eller utvalsleiar.

§ 5-3. Synfaringar o.a. arbeid utanfor møta

Ved deltaking på synfaringar og anna arbeid utanfor møta som vert gjort av det samla utvalet, vert det gitt møtegodtgjersle, vederlag for tapt arbeidsinntekt og skyss-, kost- og opphaldsgodtgjersle. Dette gjeld likevel ikkje for rollane nemnt under § 2-5 i forskrifta.

Første ledd gjeld og når utvalet, fylkesordførar eller fylkesrådmannen har bede om at ein eller fleire medlemer føretek synfaring.

§ 5-4. Særleg om reiser for gruppeleiarar

Alle parti sine gruppeleiarar skal ha rett til ei dekka reise kvar veke innad i Vestland fylke. Reisene kan gå over inntil to dagar. Reiser mindre enn 40 kilometer vert ikkje dekka. Reiser for møte i folkevalde organ kjem i tillegg. Ordninga kan ikkje nyttast til reine partiarrangement. Fylkesordførar får fullmakt til å godkjenne eventuelle reiser utover dette.

0 Tilføyd ved forskrift 17 juni 2021 nr. 2144.

Kapittel 6. Vederlag for påførte utgifter

§ 6-1. Utgifter i samband med tilsyn til barn under 12 år, funksjonshemma, eldre og sjuke

Folkevalde skal ha vederlag for påførte utgifter som følge av ombodet. Det gjeld ein sats for legitimerede utgifter og ein sats for ulegitimerede utgifter, jf. § 15-1 i forskrifta.

Dersom det ikkje ligg føre dokumentasjon på utgiftene, vert vederlag gitt etter satsen for ulegitimert tap såframt utgiftene er sannsynleggjort. Det er i alle høve ein føresetnad at det ligg føre eit økonomisk tap.

Aktuelle utgifter vil m.a. kunne vere utgifter til stadfortredar, tilsyn til barn under 12 år og funksjonshemma, samt stell av sjuke og eldre.

Vederlag for påførte legitimerede utgifter vert dekka inntil eit visst beløp, jf. § 15-1 i forskrifta. I slikt tilfelle skal alderen på barnet og at tilsynet har funne stad dokumenterast. Det er ein føresetnad at omsorgsansvaret elles ville ha hindra den folkevalde i å delta i møtet.

Kapittel 7. Skyss og køyregodtgjersler m.m.

§ 7-1. Generelt

Dei folkevalde skal ha skyss-, kost- og opphaldsgodtgjersle etter det kommunale reiseregulativet ved møte eller oppdrag på vegner av fylkeskommunen.

§ 7-2. Skyssgodtgjersle

Den folkevalde får dekka reiseutgifter frå heimstaden/arbeidsstaden.

Dersom den folkevalde på grunn av utdanning, verneplikt, jobb eller liknande oppheld seg ein annan stad enn heimstaden, vert det dekka reiseutgifter til og frå den staden ein oppheld seg som følge av dette. Fylkesordførar kan i særskilte tilfelle gjere unntak frå dette.

Det er høve for fylkeskommunale folkevalde representantar å nytte eige skyssmiddel for reiser til og frå møte.

§ 7-3. Overnattingsgodtgjersle

Når det vert lagt opp til at overnatting vert dekkja av fylkeskommunen, vil dette gå fram av innkallinga til dei fylkeskommunale møta.

Utover det dekkjer fylkeskommunen overnatting:

- a. Når fylkeskommunale møte eller møte representanten deltek på som fylkeskommunal folkevald/på vegne av fylkeskommunen går over fleire døger, eller representanten må møte på møte påfølgjande dag og reiseavstand til heimen er på minst 100 km med bil eller minst 1,5 timar reise med kollektive transportmiddel (målt etter www.vegvesen.no/trafikk hjå Statens vegvesen).
- b. Når det ikkje er praktisk mogeleg å komme seg heim med kollektiv reise, eller at heimreise medfører urimeleg lang tidsbruk for representanten dersom representanten skal på fylkeskommunale oppdrag neste dag.
- c. Dersom møtet varer så lenge ut over kvelden at representanten ikkje kan nå heim same dag.
- d. Reglane gjeld tilsvarande for gruppemøte før fylkestingsmøte.
- e. Fylkesordføraren tolkar regelverket og kan gjera unntak.

Kapittel 8. Utgifter til telefon og breiband

§ 8-1. Telefon og breiband

Fylkeskommunen held mobiltelefon for fylkesordførar og fylkesvaraordførar, og dekkjer alle utgiftene ved abonnementet, jf. elles fylkeskommunen sitt telefonreglement så langt det passar.

Fylkestinget elles og leiaren for kontrollutvalet får ei fast telefon- og breibandgodtgjersle per år, jf. § 15-1 i forskrifta.

Kapittel 9. Pensjonsmedlemskap, forsikringar og permisjon

§ 9-1. Medlemskap i Storebrand

Folkevalde skal ha medlemskap i Storebrand. Grensa for innmelding i pensjonsordninga for folkevalde vert fastsett til 3 % av grunnlaget for godtgjersle som er fastsett i reglement om godtgjersle for folkevalde i VLFK.

0 Endra ved forskrift 17 juni 2021 nr. 2144.

§ 9-2. Gruppelivsforsikring

Folkevalde som er medlem i pensjonsordninga i Storebrand er også dekkja av fylkeskommunen si gruppelivsforsikring som har heimel i Hovudtariffavtalen kap. 1, § 10.5

0 Endra ved forskrift 17 juni 2021 nr. 2144.

§ 9-3. Reiseforsikring

Det er teikna reiseforsikring for folkevalde. Ordninga gjeld for reiser som følgje av vervet, og kun desse.

§ 9-4. Yrkesskade

Folkevalde som er frikjøpt med grunnlag i minst 50 % av berekningsgrunnlaget skal ha same rett til ytingar ved yrkesskade som dei tilsette i fylkeskommunen.

§ 9-5. Permisjon

Folkevalde som er frikjøpt med grunnlag i minst 50 % av berekningsgrunnlaget kan få permisjon i samsvar med arbeidsmiljølova § 12-1 til § 12-10, § 12-12 og § 12-15. Under permisjonen beheld den folkevalde godtgjersla i inntil to veker, med mindre ein gir avkall på den.

Under svangerskapspermisjon, omsorgspermisjon, fødselspermisjon, foreldrepermisjon og permisjon ved barn – og barnepassar sin sjukdom har den folkevalde rett til å behalde godtgjersla etter dei same reglane som dei tilsette i fylkeskommunen.

Fylkeskommunen betaler berre ut ytingar i arbeidsgjevarperioden og innafor dei rammar kor fylkeskommunen er betalingspliktig. Ytingar som NAV er ansvarleg for må betalast ut direkte frå NAV til den folkevalde. Dette gjeld til dømes utover dei 10 dagane ein har ved barn/barnepassar sin sjukdom. Ved fødsels- og adopsjonspermisjon vil fylkeskommunen betale ut differansen mellom ytingar utbetalt frå NAV og den godtgjersla den folkevalde får frå fylkeskommunen. Dette gjeld og ytingar utover 6G. Fylkeskommunen betaler likevel ikkje godtgjersle lengre enn 12 md. Føresetnaden er at ein har teke til i vervet. Fylkeskommunen har ikkje innsynsrett inn mot NAV, og den folkevalde skal difor sende all naudsynt dokumentasjon snarast.

0 Endra ved forskrift 17 juni 2021 nr. 2144.

Kapittel 10. Ordningar for fylkesordførar og fylkesvaraordførar

§ 10-1. Husvære

Fylkeskommunen skal etter behov syte for høveleg husvære og dekkjer dei faste utgiftene med leige, straum m.m.

§ 10-2. Dekking av spesielle reiseutgifter, mv.

Fylkestinget skal fastsette særskilte reglar for dekking av reiseutgifter til og frå heimstaden på bakgrunn av kven som innehar vervet og kva som er rimeleg i det enkelte tilfellet. Skyss- og kostgodtgjersle vert gjeve etter det kommunale regulativet.

Kapittel 11. Politikardagar

§ 11-1. Politikardagar

Leiarar/medlemer i andre utval som ikkje er medlemer i fylkestinget skal ha høve til å møte på politikardagar dersom det er aktuelle saker som vedkjem deira utval. Dei skal då få dekkja utgiftene til reise, overnatting, møtegodtgjersle og eventuell kompensasjon for tapt arbeidsinntekt. Fylkesordføraren avgjer i tvilstilfelle.

Kapittel 12. Ettergodtgjersle

§ 12-1. Ettergodtgjersle

Folkevald som er frikjøpt med grunnlag i minst 50 % av berekningsgrunnlaget og som ikkje vert attvald, som fråtrer vervet eller som får vervet redusert, kan søke om å få ettergodtgjersle slik:

- a. Folkevald som ikkje har arbeid å gå til får ettergodtgjersle i tre månader.
- b. Folkevald som har arbeid å gå til får ettergodtgjersle i ein og ein halv månad.

Ettergodtgjersla skal vere lik den faste godtgjersla vedkomande hadde, ev. differansen mellom denne og ny godtgjersle.

Kapittel 13. Innlevering av reiserekning mv.

§ 13-1. Innlevering av reiserekning mv.

Reiserekning med krav om godtgjersler og vederlag bør leverast seinast tre månader etter at møtet er halde.

Fylkesrådmannen avgjer om vesentleg brot på denne fristen skal medføre at reiserekninga ikkje vert godkjent.

Eventuelt utbetalt reiseforskot vert trekt ved oppgjeret av reiserekninga.

Kapittel 14. Frikjøpsordninga

§ 14-1. Frikjøpsordninga

Stønad til frikjøp for politisk arbeid vert gjeve til partigruppene i fylkestinget med 20 640,- per fylkestingsrepresentant per år. Frikjøpsmidlane vert utrekna og fordelt på fylkestinget sine medlemmer, med unntak av fylkesordførar, fylkesvaraordførar, hovudutvalsleiarane, kontrollutvalsleiar og gruppeleiarane.

Partigruppene fordeler midlane sjølve. Stønaden vert utbetalt på grunnlag av gruppeleiareren sin attestasjon.

Når fylkeskommunen føretek utbetaling direkte til ein medlem vert dette registrert som honorar, og det vert trekt skatt og rekna arbeidsgivaravgift av beløpet.

Kapittel 15. Regulativ for godtgjersler og vederlag til folkevalde

§ 15-1. Regulativ for godtgjersler og vederlag til folkevalde

Folkevalde vert rekna som 100 % frikjøpt når ein i sum har godtgjersle tilsvarande 92 % av stortingsrepresentantane si godtgjersle. Godtgjerslene er rekna med eit grunnlag pr. 1. mai 2019 på 908 957 kr. Dei faste godtgjerslene vert regulerte i tråd med stortingsrepresentantane si årlege lønsregulering pr. 1. mai. Godtgjersler og vederlaga vert elles regulerte per 1. mai i samsvar med årslønsveksten i det kommunale tariffområdet.

Dei nye satsane vert slik:

Faste godtgjersle per år:

	<i>%-sats</i>	<i>Beløp</i>
Fylkesordfører		kr 1 239 563
Fylkesvaraordfører		kr 987 997
Leiar i HU	50 %	kr 454 479
Leiar i KU	50 %	kr 454 479
Fylkesutvalsmedlem	50 %	kr 454 479
Nestleiar HU og KU	10 %	kr 90 896
Fylkestingsmedlem	5 %	kr 45 448
Hovudutvalsmedlem og kontrollutvalsmedlem	5 %	kr 45 448
Leiar yrkesopplæringsnemnda	3 %	kr 27 269
Leiar for trafikktryggingsutvalet	3 %	kr 27 269
Leiar for styret for fagskuleutdanninga	3 %	kr 27 269
Leiar for fylkesråd for eldre	3 %	kr 27 269
Leiar for fylkesråd for menneske med neds. funksj.	3 %	kr 27 269
Leiar for medverknadsorganet for ungdom	3 %	kr 27 269
Leiar for Klagenemnda	3 %	kr 27 269
Gruppeleiarar		
Inntil 9 medlem i FT	35 %	kr 318 135
10 eller meir	50 %	kr 454 479
Telefon og breiband godtgjersle		
Medlem av fylkestinget		kr 3 840
HU-leiar, KU-leiar, Fylkesutvalsmedlem og gruppeleiarar		kr 7 500
Frikjøpsordning		kr 20 640

Godtgjersle og vederlag per møtedag:

		<i>Beløp</i>
Møtegodtgjersle		kr 1 510
Vederlag for ulegitimert tap i inntekt		kr 1 620
Vederlag for legitimert tap i inntekt	inntil	kr 4 315
Vederlag for påførde ulegitimerte utgifter		kr 755
Vederlag for påførde legitimerede utgifter	inntil	kr 1 620

0 Endra ved forskrift 17 juni 2021 nr. 2144.

Kapittel 16. Ikrafttredelse

§ 16-1. Ikrafttredelse

Forskrifta trer i kraft 15. oktober 2019.

Saksnr: 2019/20-1
Saksbehandlar: Thorbjørn Aarethun

Saksframlegg**Saksgang**

Utval	Saknr.	Møtedato
Fylkesutvalet		24.10.2019
Fylkestinget		17.12.2019

Fordelingsnøkkel for partistøtte i Vestland fylkeskommune**Forslag til innstilling**

1. Fylkestinget vedtek ordning med støtte til politiske parti i Vestland fylkesting, og vil fastsette økonomiske rammer for ordninga i fylkesbudsjettet for 2020.
2. Fylkestinget legg til grunn at midlar i ordninga vert fordelt med 15% av vedteke ramme fordelt likt på alle parti som grunnstønad, og resten (85%) vert fordelt til partia per. representant i fylkestinget.
3. Fylkestinget går inn for at ordninga gjeld frå Vestland fylkesting er konstituert 15.oktober 2019, og at det vert lagt opp til etterbetaling av perioden fram til 1.1.2020, ved første utbetaling i 2020.

For parti som i dag mottek slik støtte frå dagens fylkeskommunar, vil det bli gjort eit fråtrekk for perioden fram til 1.1.2020. Dersom parti mottek like mykje eller meir støtte i tilsvarande ordning frå dagens fylkeskommunar fram til 1.1.2020, vil dei ikkje motta slik etterbetalt støtte i tillegg frå Vestland fylkeskommune for denne perioden.

Samandrag

På møte i fellesnemnda, 14.februar 2019, vart det handsama sak om godtgjersle og arbeidsvilkår for dei folkevalde. I denne saka vart det og vist til den fylkeskommunale ordninga med partistøtte til partia i fylkestinget, og at ein ville kome attende til fordeling av midlar innanfor denne ordninga i Vestland fylkeskommune.

Prosjektlear legg med dette fram ei sak om fordelingsnøkkel innanfor ei eventuell ordning med tilskot til politiske parti i Vestland fylkesting. Prosjektlear føresler at midlar i ordninga vert fordelt med 15% av vedteke ramme fordelt likt på alle parti som grunnstønad, og resten (85%) vert fordelt til partia per. representant i fylkestinget.

Ordninga er heimla i partilova §10. Fylkestinget gjer endeleg vedtak om vidareføring og økonomiske rammer for ordninga, samt innretning og fordelingsnøkkel innanfor dei vedtekne rammene.

Rune Haugsdal
Prosjektlear

Ingrid Holm Svendsen
påtroppande fylkesdirektør for
organisasjon og økonomi

Saksframlegget er godkjent elektronisk og har difor inga handskriven signatur.

Saksutgreiing

Bakgrunn for saka

På møte i fellesnemnda, 14.februar 2019, vart det handsama sak om godtgjersle og arbeidsvilkår for dei folkevalde. I denne saka vart det og vist til den fylkeskommunale ordninga med partistøtte til partia i fylkestinget, og at ein ville kome attende til fordeling av midlar innanfor denne ordninga i Vestland fylkeskommune.

I inneverande budsjett for fylkeskommunane Sogn og Fjordane og Hordaland ligg det inne ei ramme til tilskot til politiske parti i fylkestinget. Tilskotet vert gitt til partia sine fylkeslag. Fylkeskommunane har i dag ulik fordelingsnøkkel for tildeling av slik støtte til dei politiske partia i fylkestinget.

Prosjektleiar legg med dette fram ei sak om fordelingsnøkkel innanfor ei eventuell ordning med tilskot til politiske parti i Vestland fylkesting.

Vedtakskompetanse

Fylkestinget gjer vedtak om partistøtte etter partilova §10.

Vurderingar og verknader

Økonomi: Vedtak om økonomisk ramme for ordninga har budsjettkonsekvens

Klima: Ikkje relevant

Folkehelse: Ikkje relevant

Regional planstrategi: Ikkje relevant

Kort om ordninga med partistøtte

Med grunnlag i partilova §10 har fylkeskommunane i dag ei ordning med støtte til politiske parti i fylkestinget. Vanleg praksis er at denne støtta vert utbetalt til fylkeslaga av dei partia som er representert i fylkestinget, og er tenkt nytta til tiltak og støtte inn mot partigruppene i fylkestinget.

I tillegg til denne partistøtteordninga er det i godtgjerslereglementet for folkevalde i Vestland fylkeskommune lagt opp til ei frikjøpsordning for politisk arbeid i partigruppene i fylkestinget med kr. 20 640,- per fylkestingsrepresentant per år. Frikjøpsmidlane vert fordelt mellom partigruppene, og utrekna på fylkestinget sine medlemmer, med unntak av fylkesordførar, fylkesvaraordførar, hovudutvalsleiarane, kontrollutvalsleiar og gruppeleiarane.

I godtgjerslereglementet er det og lagt opp til frikjøp av gruppeleiarane med kr 318 125,- for grupper inntil 9 medlemmar og kr. 454 479,- for grupper med 10 eller fleire medlemmar.

Partistøtte - dagens samla ramme

Omrekna til 2020 kr er det i budsjettet for inneverande år i Sogn og Fjordane fylkeskommune lagt inn kr 4 946 000 til tilskot til politiske parti i fylkestinget. Tilsvarende beløp for Hordaland fylkeskommune er kr 6 175 000. Tilskot til sekretær for politisk leiing og tilsvarende tilskot til opposisjonspartia i Hordaland fylkesting er ikkje med i dette beløpet. Det er ikkje avklart korleis denne sekretærstøtta til politisk leiing vil bli organisert i Vestland fylkeskommune.

Samla ramme som er sett av til dette føremålet i dei to fylkeskommunane er dermed 11,121 mill. 2020 kr.

Dagens fordelingsnøkkel i dei to fylkeskommunane

Sogn og Fjordane fylkeskommune

Det er her lagt opp til berekning av tilskot til partia med utgangspunkt i ein grunnstønad på 15 % av ramma (lik sum til kvart parti) og 85 % vert fordelt ut frå stemmer (lik sum per stemme ved valet). Med grunnlag i denne fordelingsnøkkel og valresultatet 2019, vil fordelinga av partistøtte innanfor dagens ramme til det nye fylkestinget i Vestland sjå slik ut:

	Grunnstønad	Stemme	Sum
Arbeiderpartiet	151 650	1 962 458	2 114 108
Høyre	151 650	1 723 636	1 875 286
Senterpartiet	151 650	1 514 783	1 666 433
Folkeaksjonen Nei til mer bompenger	151 650	875 083	1 026 733
Fremskrittspartiet	151 650	827 045	978 695
Miljøpartiet De Grønne	151 650	687 428	839 078
Sosialistisk Venstreparti	151 650	612 149	763 799
Kristelig Folkeparti	151 650	470 423	622 073
Venstre	151 650	341 591	493 241
Rødt	151 650	330 248	481 898
Pensjonistpartiet	151 650	108 006	259 656
Sum	1 668 150	9 452 850	11 121 000

Hordaland fylkeskommune

Det er her lagt opp til berekning av tilskot til partia med utgangspunkt i ein grunnstønad på 12,5 % av ramma (lik sum til kvart parti), 44,5 % vert fordelt per representant (lik sum per representant) og 43 % vert fordelt ut frå stemmer (lik sum per stemme). Med denne fordelingsnøkkelen og valresultatet 2019, vil fordelinga av partistøtte innanfor dagens ramme til det nye fylkestinget i Vestland sjå slik ut:

	Grunnstønad	Pr. repr.	Stemme	Sum
Arbeiderpartiet	126 375	1 065 905	992 773	2 185 053
Høyre	126 375	913 633	871 957	1 911 965
Senterpartiet	126 375	761 361	766 302	1 654 038
Folkeaksjonen Nei til mer bompenger	126 375	456 816	442 689	1 025 880
Fremskrittspartiet	126 375	456 816	418 388	1 001 579
Miljøpartiet De Grønne	126 375	380 680	347 757	854 813
Sosialistisk Venstreparti	126 375	304 544	309 675	740 595
Kristelig Folkeparti	126 375	228 408	237 979	592 762
Venstre	126 375	152 272	172 805	451 452
Rødt	126 375	152 272	167 067	445 714
Pensjonistpartiet	126 375	76 136	54 638	257 149
	1 390 125	4 948 845	4 782 030	11 121 000

Konklusjon - fordelingsnøkkel i Vestland fylkeskommune

Prosjektleiari vil understreke behovet for at fordelingsnøkkelen til partistøtta både ivareteke eit basisbehov til dei mindre partia, men også reflekterer representasjonen dei ulike partia har fått i fylkestinget gjennom kommune- og fylkestingsvalet 2019.

Prosjektleiari vil understreke at dette ikkje bør vere ei partistøtte til den generelle verksemda i fylkeslaga til dei politiske partia, men heller midlar som i størst mogleg grad vert sett av til tiltak inn mot fylkestingsrepresentantane.

Den nasjonale ordninga for partistøtte legg opp til at det kan søkast om støtte til den generelle verksemda i partia, og der tilskot pr. stemme er eit sentralt tildelingskriterium.

For å markere eit skilje til den nasjonale ordninga vil prosjektleiari gå inn for ein fordelingsnøkkel som inneheld ei grunnstøtte på 15% av ramma og der resten vert fordelt til partia pr. representant. Dette vil medføre ei lik støtte til like store partigrupper, samt tydeleggjere at den fylkeskommunale partistøtta i størst mogleg grad bør nyttast til tiltak inn mot fylkestingsrepresentantane, og ikkje fungere som støtte til den generelle partiverksemda slik den nasjonale partistøtteordninga legg opp til.

Fleire andre fylkeskommunar legg og opp til ei slik fordeling pr. representant i tillegg til grunnstønad.

Med ein slik fordelingsnøkkel og valresultatet 2019, vil fordelinga av partistøtte innanfor dagens ramme til det nye fylkestinget i Vestland sjå slik ut:

	Grunnstønad	pr representant	Sum
Arbeiderpartiet	151 650	2 035 998	2 187 648
Høyre	151 650	1 745 142	1 896 792
Senterpartiet	151 650	1 454 285	1 605 935
Folkeaksjonen Nei til mer bompenger	151 650	872 571	1 024 221
Fremskrittspartiet	151 650	872 571	1 024 221
Miljøpartiet De Grønne	151 650	727 142	878 792
Sosialistisk Venstreparti	151 650	581 714	733 364
Kristelig Folkeparti	151 650	436 285	587 935
Venstre	151 650	290 857	442 507
Rødt	151 650	290 857	442 507
Pensjonistpartiet	151 650	145 428	297 078
	1 668 150	9 452 850	11 121 000

Prosjektleiari legg til grunn at ordninga vil gjelde frå Vestland fylkestinget er konstituert 15.oktober 2019, og at det vert lagt opp til etterbetaling av perioden fram til 1.1.2020, ved første utbetaling i 2020.

For parti som i dag mottek slik støtte frå dagens fylkeskommunar, vil det bli gjort eit fråtrekk for perioden fram til 1.1.2020. Dersom parti mottek meir støtte i tilsvarande ordning frå dagens fylkeskommunar fram til 1.1.2020, vil dei ikkje motta slik etterbetalt støtte i tillegg frå Vestland fylkeskommune for denne perioden.

Saksprotokoll i fylkestinget - 17.12.2019

Aleksander Øren Heen (SP) sette på vegner av Sp, Ap, MDG, SV, KrF og V fram slikt forslag:

- (a) «Nytt punkt
Dei partipolitiske sekretariata skal knytast opp mot dei same digitale løysingane som faste fylkestingsmedlemar. Partisekretariata skal gratis stillast til disposisjon eit lese Brett og evt. ein politikar-pc. Partisekretariata skal for eigen kostnad kunne knyte fleire brukarar til ordningane.»
- (b) «Nytt punkt
Fylkestinget vedtek at alle parti sine gruppeleiarar skal ha rett til ei dekkja reise kvar veke innad i Vestland fylke. Reisene kan gå over inntil to dagar. Reiser mindre enn 40 kilometer vert ikkje dekkja. Reiser for møte i folkevalde organ kjem i tillegg. Ordninga kan ikkje nyttast til reine partiarrangement. Fylkesordførar får fullmakt til å godkjenne eventuelle reiser utover dette.
- Dette er eit tiltak som skal jamne ut kostnader mellom parti som har gruppeleiar som bur sentralt eller har lengre reiseveg. Det vil kunne forebygge at parti ikkje vil velje politikarar utfrå bustad og kostnader, noko som ville vore eit demokratisk problem.»
- (c) «Nytt punkt
Fylkestinget ber om ei sak til fylkestinget i juni 2020 der ein går gjennom reiseregulativ m.v. for politikarane i Vestland fylkeskommune.»

Silja Ekeland Bjørkly (H) sette fram slikt forslag:

«Alternativ

1. Fylkestinget vedtek ordning med støtte til politiske parti i Vestland fylkesting, og vil fastsette økonomiske rammer for ordninga i fylkesbudsjettet for 2020.
2. Fylkestinget legg til grunn at midlar i ordninga vert fordelt med 15% av vedteke ramme fordelt likt på alle parti som grunnstønad, og resten (85%) vert fordelt til partia per. representant i fylkestinget.
3. Fylkestinget går inn for at ordninga gjeld frå Vestland fylkesting er konstituert 15.oktober 2019, og at det vert lagt opp til etterbetaling av perioden fram til 1.1.2020, ved første utbetaling i 2020.

For parti som i dag mottek slik støtte frå dagens fylkeskommunar, vil det bli gjort eit fråtrekk for perioden fram til 1.1.2020. Dersom parti mottek like mykje eller meir støtte i tilsvarande ordning frå dagens fylkeskommunar fram til 1.1.2020, vil dei ikkje motta slik etterbetalt støtte i tillegg frå Vestland fylkeskommune for denne perioden.»

Knut Inge Andersen (FNB) sette fram slikt forslag:

«Endring

Satsane for partigodtgjersle i Vestland vert reduserte med 20%.»

Avrøysting

Andersen sitt forslag fekk 8 røyster (FNB, R) og fall.

Innstillinga vart vedteke med 41 røyster mot 24 røyster (H, Frp, FNB) for Ekeland Bjørkly sitt forslag.

Øren Heen sitt forslag (a), (b) og (c) vart vedteke mot 24 røyster (H, Frp, FNB).

Vedtak

1. Fylkestinget viser til §10 i partilova om «overordnede prinsipper for offentlig støtte» og legg denne til grunn for Vestland fylke si partistøtteordning.

Fylkestinget vedtek ordning med støtte til politiske parti i Vestland fylkesting, og vil fastsette økonomiske rammer for ordninga i fylkesbudsjettet for 2020.

2. Fylkestinget legg til grunn at midlar i ordninga vert fordelt med 15% av vedteke ramme fordelt likt på alle parti som grunnstønad, og resten (85%) vert fordelt til partia etter tal røyster ved valet 2019.
3. Ordninga gjeld frå 1. januar 2020. Partistøtta skal årleg utbetalast til dei politiske partia sin fylkesorganisasjon som eit eingongsbeløp i januar.
4. Fylkestinget legg til grunn at midlane vert disponert slik at gruppene skal kunne utføre sitt arbeid og sine planar på ein god og tilfredsstillande måte.
5. Dei partipolitiske sekretariata skal knytast opp mot dei same digitale løysingane som faste fylkestingsmedlemar. Partisekretariata skal gratis stillast til disposisjon eit lese Brett og evt. ein politikar-pc. Partisekretariata skal for eigen kostnad kunne knyte fleire brukarar til ordningane.
6. Fylkestinget vedtek at alle parti sine gruppeleiarar skal ha rett til ei dekkja reise kvar veke innad i Vestland fylke. Reisene kan gå over inntil to dagar. Reiser mindre enn 40 kilometer vert ikkje dekkja. Reiser for møte i folkevalde organ kjem i tillegg. Ordninga kan ikkje nyttast til reine partiarrangement. Fylkesordførar får fullmakt til å godkjenne eventuelle reiser utover dette.

Dette er eit tiltak som skal jamne ut kostnader mellom parti som har gruppeleiar som bur sentralt eller har lengre reiseveg. Det vil kunne forebygge at parti ikkje vil velje politikarar utifrå bustad og kostnader, noko som ville vore eit demokratisk problem.

7. Fylkestinget ber om ei sak til fylkestinget i juni 2020 der ein går gjennom reiseregulativ m.v. for politikarane i Vestland fylkeskommune.